

Islom Karimov nomidagi Toshkent davlat texnika universiteti
Olmalik filiali talaba-yoshlari o'rtasida o'tkaziladigan
“Kitobxon yoshlar” tanlovining

NIZOMI

I. Umumiy qoidalar

1. Mazkur tanlov filial talaba-yoshlari o'rtasida ma'naviy-ma'rifiy va tarbiyaviy ishlar samaradorligini oshirish, kitobxonlik va mutolaa madaniyatini keng targ'ib etish, kitobga bo'lgan qiziqishini yanada oshirish, targ'ibot-tashviqot ishlarini samarali va tizimli tashkil etish va rag'batlantirish maqsadida tashkil etiladi.

2. “Kitobxon yoshlar” tanlovida ta'lim yo'nalishi, sohasi, mutaxassisligidan qat'iy nazar, filialdagi barcha tahsil olayotgan talabalar jamoaviy bo'lib ishtirok etadi.

3. Tanlovda talaba-yoshlarning keng qamrovli ishtiroki oliy ta'lim muassasalarining Yoshlar masalalari va ma'naviy-ma'rifiy ishlar bo'yicha birinchi prorektori hamda fakultet dekan o'rinbosarlari tomonidan ta'minlanadi va muvofiqlashtiriladi.

II. Tanlovning maqsadi va vazifalari

4. Tanlovning asosiy maqsadi - talaba-yoshlar o'rtasida badiiy asarlarning hayotimizdagi o'rni va ahamiyatini targ'ib qilish orqali yoshlarimizni har tomonlama sog'lom va barkamol etib tarbiyalash, ularning kitobdan foydalanishlari uchun shart-sharoitlar yaratish, mustaqil va erkin fikrga ega iste'dodli yoshlarni har tomonlama qo'llab-quvvatlashdan iborat.

5. Tanlovning vazifalari quyidagilardan iborat:

mamlakatimizda kitobxonlikni keng targ'ib etish;

badiiy asarlarni yaratish va qo'llab-quvvatlash borasida amalga oshirilayotgan keng ko'lamli ishlarni hamda jamiyatimizda yuksak ma'naviyatni shakllantirish va mustahkamlashda badiiy asarlar roli va ahamiyatini yoshlar ongiga singdirish;

ijodkorlar tomonidan yangi yaratilgan badiiy asarlar bilan talaba-yoshlarni yaqindan tanishtirib borish, ularda kitobni mutolaa qilish, tahlil qilib, o'zlarining mustaqil fikr bildirishga oid ko'nikma va malakalarini shakllantirish;

yoshlar o'rtasida kitobxonlik harakati targ'iboti ta'sirchanligini yanada oshirish;

kitobning yosh avlodni har tomonlama yetuk, yuksak ma'naviyatli, intellektual salohiyatli, ota-onasiga, Vataniga sadoqatli insonlar qilib tarbiyalashdagi ahamiyati to'g'risida talabalarning tasavvurlarini yanada boyitish;

iste'dodli va iqtidorli talabalarni rag'batlantirishdan iborat.

III. Ko'rik-tanlovini o'tkazish shartlari baholash mezonlari

6. Filial fakultetlari talabalari o'rtasida "Kitobxon yoshlar" tanlovini o'tkazish bo'yicha professor-o'qituvchilar, boshqa mutaxassislardan iborat **Hakamlar hay'ati** tuziladi.

7. Tanlov oliy ta'lim muassasasi bosqichda, fakultetlararo tuzilgan har bir fakultetdan 1 nafardan jamoa ishtirok etadi.

8. Har bir jamoada 6 tadan ishtirokchi tarkibda shakllantiriladi.

Tanlov shartlari quyidagicha:

1- shart "Men yoqtirgan asar" sharti.

Bunda, ishtirokchi jamoaning faqat 1 ta jamoa a'zosi tomonidan "Men yoqtirgan asar" nomi ostida o'zi sevib o'qigan asari bo'yicha qisqacha 3 daqiqa annotatsiya beradi. "Annotatsiya mahorati" shartida Hakamlar hay'ati ishtirokchilarning "Asarga tayyorlangan annotatsiya"sini baholashda ularning yoqtirgan asarni o'qiganligini tekshiradi hamda mohiyatini to'g'ri tushungani va ifoda etib bera olish qobiliyati, asarning g'oyasi va mazmunining to'liq qamrab olinganligi, kitobxon tomonidan asarga munosabatning (tanqidiy yoki ijobiy) qiziqarli va jozibador tarzda bildirilganligi, annotatsiya matnida fikrni ifodalash uslubi, badiiy obrazlarning real hayot bilan bog'liq ibratli tomonlari ochib berilganligiga qarab ball beradi. Ushbu shart 1-10 ballgacha (maksimal 10 ball) baholanadi.

2- shart "Eng bilimdon kitobxon" savol-javob sharti.

Bunda, tanlov ishtirokchilari o'rtasida 30 ta Jadidlar hayoti va ijodidan savol-javob o'tkaziladi. Barcha jamoalarga bir vaqtning o'zida bir xil savol beriladi. Jamoalar bergan javoblarini 1 daqiqa ichida blankka yozib berishlari kerak bo'ladi. Ushbu shart 1 ta savol uchun 1 balldan jami 30 ball bilan baholanadi.

Jamoalarning to'plagan ballari o'zaro teng kelib qolgan taqdirda 2-shart asosida qo'shimcha savollar beriladi va g'olib jamoa aniqlanadi.

9. 1-shartda Hakamlar hay'atining har bir a'zosi o'zining bahosini namoyishkorona e'lon qiladi va asoslab beradi. Barcha a'zolarining qo'ygan ballari umumlashtirilib, ularning umumiy soniga bo'lingan holda 1-shart uchun o'rtacha ball chiqariladi.

10. Yakuniy ball - tanlovning ikkita sharti natijalari bo'yicha ishtirokchilarning to'plagan ballarini qo'shish ($10+30=40$ ball) natijasi asosida aniqlanadi.

V. Tanlovni o'tkazish tartibi va muddatlari

11. Tanlovni o'tkazish bo'yicha ta'lim muassasasida Ishchi guruh tuziladi. Ishchi guruhga filial Yoshlar masalalari va ma'naviy — ma'rifiy ishlar bo'yicha birinchi prorektor rahbarlik qiladi hamda yuqori saviyada tashkil etilishiga shaxsan mas'ul hisoblanadi.

12. Barcha bosqichlar bo'yicha soha olimlari, yozuvchilar, soha mutaxassislaridan iborat tarkibda Hakamlar hay'ati tuziladi.

13. Tanlov joriy yilning **sentyabr oyidan dekabr** oyigacha bo'lgan davrda **har oyda bir marotaba**, ikkinchi o'n kunlikda o'tkaziladi.

VI. Tanlov g'oliblarini taqdirlash

14. Tanlovning barcha ishtirokchilari fakultetlar tomonidan sertifikat va qimmatbaho sovg‘alar bilan taqdirlanadi.

VII Yakuniy qoidalar

15. Tanlov natijalari ijtimoiy tarmoqlarda va rasmiy veb-saytlarda e’lon qilib boriladi.

16. Hakamlar hay’ati tomonidan belgilangan o‘rin yuzasidan izoh beriladi. Qabul qilingan qarorni muhokama etishga yo‘l qo‘yilmaydi.